



*Kamis, 2 Desember 2021*  
**Ogen: Esekiel 20:25-32**



**Mpekeke Rawa Tuhan**



**W** Habis manis sampah dibuang” sada pribahasa si nuriken kerna ngelupakan kalak si pernah erbahan si mehuli. Sanga perlu e mehuli kal perbahanenna, tapi kenca ialokenna sura-surana ilupakenna kalak si enggo erbahan mehuli ndube. La sekali ngenca, tapi dua, telu seh empat kali ilakokenna e. Jujurna adi lit kalak si erbahan bage banci mpeturah rawanta. Nembeh ateta sabap bas perluna e saja ngenca kita idahina. Bas paksa lit sura-surana ngenca ia erbahan si mehuli. Tapi i bas paksa kita perlu ia, la tempa kita i tandaina; lupa ia kerina perbahanen si mehuli si enggo pernah ilakoken.

Dibata enggo ncidahkan keleng ateNa man bangsa pilihanNa e me bangsa Israel. Iarak-arakNa kegeluhenna. ItaruhkenNa ku negeri si mehumur. I pasu-pasuNa, itaruhkenNa ku negri si enggo ipadanken Tuhan, idahna uruk-uruk si meganjang ras kayu si meratah (Ay. 28) si labo bekasna latih, labo perbahan kiniulinna, tapi kenca si e kerina ialokenna i lupakenna Dibata. Ilakokenna perbahanen si petembil ras sura-sura Tuhan. Ibahanna persembahen man dibata-dibata sideban i bas ingan si meganjang pemere Dibata ndube. Lanai patuh man perintah Tuhan. Iliamina wari sabat, dengen icurnakenna gelar Dibata arah perbahanenna, iikutkenna perbahanen ninina ndube si la patuh man Dibata. Simeluatna, enggo pe ietehna salah pang denga ka ia mindo pedah Tuhan. Ertina enggo itehna salah tapi tempa-tempa patuh arah mindo pedah man Dibata. Kerina perbahanenna enda mpekeke rawa Tuhan. Merawa Tuhan icidahkanNa arah la nehi sura-sura bangsa enda guna banci jadi seri ras bangsa-bangsa sideban.

Arah renungenta enda banci kita tole ngidah maka Tuhan e ernembeh ate man kalak si la setia. Kalak si terjeng i bas perluna saja reh man baNa, tapi man kalak si setia ipasu-pasuNa.

